

ARUBA

DOOV TA WARDA RIBA CONSEHO DI ASOMA DICIDI RIBA PERMISO PA BANDANAN DI AFO

ORANJESTAD (APA)

For di varios grupo cu lo participa den parada diadomingo awor, nos a recibi informacion cu nan ta confronta problema pa haya permiso pa gruponan musical di afo, e.o. for di St. Maarten, Statia etc. Departamento di Orden Publico y Seguridad, DOOV tin tur wanta.

Nos a aserca Joy Kock, presidente di ASOMA pa sa kico ta pasando, y a confirma di a haya e reclamo aki. ASOMA mas bien ta duna conseho na DOOV y Departamento di Trabao. Y e consehonan aki ta positivo, ya cu nan ta bin pa engrandece nos Carnaval.

Ta conoci cu nos Carnaval mester di mas grupo musical, ya cu nos Carnaval a crece y no tin suficiente agrupacion pa anima e participantenan. Joy Kock a reitira cu ASOMA a duna DOOV conseho pa

duna e permisonan desea.

Kico ta e motibu cu te ainda permiso no a ser duna, e presidente di ASOMA ta kere cu esaki lo ta debi na e proceso di documentacion cu mester ser hasi. Cu talvez no ta cla.

Joy Kock a hasi un apelacion na e gobernantenan responsabel pa traha un tiki mas diligente y duna e permisonan aki, ya cu e ta un contribucion na nos Carnaval.

Hecho ta cu si e permisonan aki tarda, y si e ser duna te diasabra ta dificil pa trese e bandanan di afo.

Nos di EXTRA a tuma contacto cu Roland Peterson, director di DOOV, kende a bisa cu ta ASOMA mes a pidi pa wanta dunamento di permiso te ora cu tur banda musical local ser contracta. Te na momento cu nos a papia cu Roland Peterson, e

no sa di e conseho faborable di ASOMA, pero asina cu nan hasi esaki, den un dia DOOV lo duna e permisonan solicita. DOOV no tey pa perhudica Carnaval, pero tey pa duna servicio.

EXTRA a papia cu Harold de Mirando, director di Entertainment Express, cual compania ta representa varios banda musical a bisa cu te ainda tin varios banda y hasta brassband cu no tin tocá ainda. Tin bandanan cu ta chikito berdad, pero cu por anima cualkier grupo.

Pero e grupo carnalishtanan mes no kier duna oportunidad na gruponan local y ta faborece un banda di afo. Lamentable mester bisa cu e gruponan di carnaval hasta ta percura pa trailer, generador pa e bandanan di afo, mientras e bandanan local ta nan mes mester percura pa tur cos.